

# فرسة وملتجمة

شعر

وفاء أمين

- الكتاب : فرصة وملتجمة
  - المؤلف : وفاء أمين
  - التصنيف : شعر
  - يصدر عن
- شعلة الإبداع للطباعة والنشر



- المشرف العام
- الشاعر الإعلامي / أشرف عزمي
- الإخراج الفني : أسماء أشرف عزمي
- ت :

٠٠٢٠١٢٨٠٥٣٤٥٠٢ / ٠٠٢٠١٠٠٩٢٦٢٠٠٠

- البريد الإلكتروني:

**shoaletalebdaa@gmail.com**

- رقم الإيداع : ٢٠١٩/٢٦٨٢١
- الترقيم الدولي : 3-58-6681-977-978

حقوق الطبع محفوظة

ويعتبر المؤلف مسئولاً مسئوليةً كاملةً عن كلِّ ما وُرِدَ في الكتاب.

## الإهداء

إلى أخي الغالي  
محمد ماضي أمين  
شاعر يتغنى بالحب للجميع  
ويعشقه الجميع!

## إلا النبي

ياكل حاقد أجنبي إلا النبي  
إلا الحبيب المصطفى والمجتبي  
نور البريه والهادي الامين  
دا مذهبي  
مين انت قول قدام حبيب الله  
أنزل عليه بقرآن حياه  
ياللي برسالته كفرت ياغبي  
داموعظة والحق مذ كان الصبي  
خاتم الرسل العظيم يانبينا ياكريم  
أفديك بنفسي وبأمي وأبي  
ياشفيح الخلق في يوم الزحام  
شمس الشמוש جميعها والاقرب  
اهفو اليك ويشكي دمعي للإله  
من كل كاره للصلاة على النبي

لو حتى عنده مأكلي او مشربي  
اصوم وامدح في اللي ورده مطلبي  
صلوا على طه الرسول  
افضل صلاة عليك يا حبيبي يانبي

# ياست الكل

سامحيني

على صدرك وضميني

ياقلب حنان مدفيني

دعاكي صلاة بتحميني

دا فرح الدنيا بيحيني

في صوتك لما تناديلي

تقوللي تعالي نور عيني

انا فتحه دراعيني

وتجري دموعي على صدرك

تشيلي الهم من عيني

بيبان كرمك تجوعني

حمول همك بيوجعني

ولا اقدر افارقك يوم

واحلم بك

في عز النوم

وزي المولى  
ماحباني ووهبك ليا  
ياحبيبة  
تعيشي زمان  
على زماني  
وتبقى من عيني قريبة

## العيش البايت

يجي غدانا وقته عشييه  
كانت تحضنا الطبلية  
احنا التسعه وابويا وامي  
خالي وستي وولاد عمي  
وقت اللمة الباب مفتوح  
اللي بيرمي سلام ويروح  
واللي يعدي نقولوا اتفضل  
على بعضينا نضم ويفضل  
مطرح له يقعد ونفضل  
نايبه علينا هو الاول  
يوم النابت كان يوم عيد  
امي تحيي الضيف وتعيد  
مد ايديك بركتنا تزيد  
قفص العيش عا الارض اتمدد  
ريحته الحلوه تجري الريق

طالع م الفرن وببوجوج  
تضرب ايدينا رغب برغب  
نفرک منه الردة الزايده  
ويا الفول عالمعدة خفيف  
تقعد امي ف ركن ورانا  
واحنا بناكل صنعة ايدها  
حلو الله يامه النبات  
مدي ايديكي حلو النبات  
امي ترد بصوتها الزاهد  
بس الملح حقيقي وحشني  
متغمس بالعيش البايث !

## بيتنا القديم

بيتنا القديم لساه عظيم  
رغم البروج الشاهقة جنبه  
ذكرياتنا الحلوة تحكي عا لحنين  
بيتنا القديم ...  
اتهد حيلو من خطى كل الحبايب  
اصحاب قرايب  
كل اللي جاب وياه سبايب  
بيتنا القديم..  
كان ياما كان  
الضحك واللمه الجميله والحنان  
طمعوا فيه حبة ديايه  
نهبوا الخضار  
وقطعوا شجر النهار ..  
والعنكبوت  
عشش على الشبابيك ودار

مفضلش غير الذكريات  
شهدت على الحزن اللي فات  
شهدت على الدفا والامان  
ايام زمان  
والقلب ساكن لسه فيه  
والحلم لسه بيناديه  
وبيحكي مع كل الحيطان  
شوقه الحزين  
لبيتنا القديم !!

## كانت أيام

متيجي معايا عالقهوة  
انا عزّمك على قهوة  
ف كبايتين وبين تقيل  
كمان حجرين داهم تقيل  
ونتبادلو سوا الحيرة  
ونرجع تاني للجيرة  
ماكنا زمان شباب حلوة  
بترقص روحنا عالغنوة  
ونتّجمع في يوم ثومه  
على حفلتها في الراديو  
ومصرف ليله معلومه  
تهيم على صوتها تتجنن  
تخللي القلب يتحنن  
حلاوة تعمّر الطاسه  
وفن بروعته واسى

ياألحانك ياسنباطي  
نقول سبحانك العاطي  
تشد معاك وترباكي  
يا زكريا ومعاك رامي  
وبيرم روحه تهواكي  
ونستنى خطاب ناصر  
وكل جماله بيناصر  
اغاني الثورة يحييها  
ياموجي حلیم يحليها  
امانينا وایامنا  
ونفتح یومي اهرامنا  
على نکتة جاهين نضحک  
ونیل شرباته بیفرق  
ولا تفرق بقله وزیر  
ونقراها صباح الخیر  
مجلتنا بمفید فوزي  
وکاریکاتیر لبهجوري

يرد بامضته رمسيس  
وتجري ف دمن الكورة  
دي غاوينها كتير مهاويس  
زمالك أهلي يا فريقين  
في بيت واحد من الاصحاب  
بيتعانقوا يقولو جون  
وبيطالبوا برهان مضمون  
وكل الحطة فرحانه  
بيوت بالحب عمرانه  
ايفون قعده مع نفيسه  
بيحكو لبعض اسرارهم  
بنات حلوة في احساسهم  
وعم فانوس من الشباك  
ينادي حسين يقول له

يا واد

تعالى وهات معاك صحبك  
وبلغ ابوك على رحلة

حنطلعها مع كنيسه  
ومين ينسى حلاوة مصر  
ومين نفسه يعيد ثاني  
جمال العصر  
اقولك ايه تقوللي ايه  
على اللي كان  
ونتهد نقول ياسلااام  
كانت ايام

## أول كلامنا

نبينا صلوا عليه الحور

ياإلي اصطفاك الإله والكون صبح بنور

أحلى كلامنا رسول إسمه لوحدہ

وصول

الميم منارة هدى تمشي خطانا بنور

مكتوب في خد السما آدم قراه مسطور

منه الحنان والرضا الانسانية رسول

الحاء حلاوة التمر

داللي اتروى بإسمه

الشهد يجلي الروح لما نقول اسمه

فرحت دموع العين ما حلا جمال رسمه

سبحانه من اسرى من مكة للأقصى

على جناح النور بالمعجزة الكبرى

كلامه صادق امين وامانتة من سره

عن الهوى لم نطق دايمه تعاليمه

الذال دليل العشق لرسالته ولدينه  
واللي يجاور النبي يسعد ولا يضيئه  
رجم الشيطان اتحرق منه بسبع

### حصوات

لجل النبي يارب تشفع لنا برضائك  
وبرحمتك يارب ترحم عباد بُهداك  
صلوا عليه تكرموا يا كل اهل الله  
وزوروا آل البيت للبركة بسم الله

صلوا عليه وسلموا

صلوا عليه وسلموا

## الأرض

الأرض مرايه مغسوله  
تلات افمام  
شبابيك البرد مقفوله  
بدفا الاحلام  
والشمع آيد في الكنايس  
والابن نام  
في حزن مريم  
ومحصناه ضد الآم  
والمساجد نورها قايد  
بالآدان  
وبين كده وبين كده  
كل الخلايق  
شايله الاماني وحلمها  
لقمة وأمان !

## جلب الحبيب

يا عم الشيخ قالولي عليك

معاك خدام

يحققوا كل الاحلام

هات الجدع

إعمل بدع ..

اجلب لي يا شيخ الحبيب

القسمه ليه اتاخرت

ولا مره واحده قدرت

سهرى ورغبة قوته

وعشقه اللي بات

كان هو اللي يحبني

وروحى دابت حبه

وسوس شيطان

طلعني يوم من جنته

في البعد عنه بقاسي مر

كاس الفراق منه أمر  
تصبح دموعي تنام تبات  
ورموشي بتلومني بسكات  
امانة لو لسه بعيد  
ارقي عيونو  
من حسد الغريب  
وصلي علي نور الحبيب  
مستنياك يا شيخ جليل  
مستنياه حبي الجميل  
من نظرته يشفيني  
من شوقي العليل..  
جوه احضان الامان..  
قلبي يهدا بالسلام  
يسقيني واشرب م الحنان  
ونعيد سوا ايام زمان!

## حلاوة روح

وبكتب لك حلاوة روح

أمل مدبوح

مابين قلبي وبين عقلي

جبال بتنوح

فأعذرني ..

ولا تلومني

عشان خوي في م الضنا مسفوح

وبهرب منه في عيونك

وامسح دمعي في وعودك

حناني يشب لحنانك

وانام على كتف احلامك

ويتحامي في حضنك شوق

وصوتك جاي يغطيني

ويحميني يشيلني لفوق

يوديني

على جنة بتحييني  
ملاك قلبك بيهديني  
يطبطبلي  
ونبضه يدق على طبلي  
يفرحني .. يضحكني  
واحبك اد مابقيلي  
حلاوة روح!

## انا وانت

انا وانت الابيض والاسود  
اتنين ماشيين على خط الآه  
لومرة اتلاقوا اللون يحود  
ولاشافوا ابدا مرة نجاة  
وحاولت اقرب الواننا  
فالقيتها رمادي وبهتانة  
بردانه ف ليها وعشمانة  
نتلقى وتجمع احلامنا  
تسقيننا الشمس الشبعانة  
الابيض قلبي ومفهمتش  
كان حلمه يحبك موافقتش  
ونسيته مشيت ولا قدرتش  
ايه يعني حياة!

## يا شباب بلدنا

يا شباب بلدنا اتجمعوا  
دقيقة واحدة اسمعوا  
لوحتى جالكوا ميت زعيم  
ومهما كان قائد عظيم  
حيطالبوا شعبه يعزلوه  
حيخونوه ..ويسرقوه  
علشان تثوروا وتكرهوه  
بينفخوا ف قلوبكوا نار  
لتحرقوا بيها الديار  
تتفرقوا  
ويجي يوم  
تتشوقوا  
لحظة عمار  
اصل الشيطان نفسه يقود  
صعبان عليه عيشة القيود

وليه تكونو جيل طاقات  
تبناو البلد تحموا الحدود  
وتزرعوا ورودكم باقات  
وتكملوا نصر الجدود

ياشباب بلدنا

إرجعوا

متسمعوش لكام وطواط  
او عولغضبكوا تسلموه  
وتنزلوه من عالبيساط  
ده لسه طالع للشروق  
علشان بلدكم تبقا فوق  
رافعة رقبته على الحدود  
كل البلاد تتمنى مصر  
تتمنى عشة فى سطحها  
تتمنى نيلها يضمها ..  
علشان تعود

مصر الوعود  
اوعواكو تنسوا واصبروا  
وبلاش نعود  
للفوضى والشهدا الجنود  
اللي واهبين السلام  
وف السلام  
بالفرحة تحكوا عالمنام  
والعيال تعرف تنام  
حرام عليكم افهموا  
بايديكو ليه تتشتتوا  
وليه بترموا نفسكم للتهلكة  
وغول الخراب  
إتستروا منكوا ف بعضكوا  
ومتفتحوش عليكمو باب ❖ ❖  
وتربسوا بالقفل حوش  
تجري عليه كل الوحوش  
تنهش امانكوا وعرضكوا

من فضلكم  
ابوس ايديكوا ورجلكم

حبة قرود  
يتنططوا على الخضار  
يتسلطوا ويقدروا  
ويقلدوا ملو الجيوب  
من عزمكم وقت الدمار..  
صدقوني حيكتروا ويهجموا  
هجوم التتار  
ياشباب بلدنا  
احفظوا الدرس القديم  
ببجدوه بمنهج عقيم  
نفس الهدف  
ويلونوه بلون الكرامة و الشرف  
بس انتو مش حبة خزف تنكسروا أو  
تتكسروا

يا فراعنة دانتو تقدرؤا  
طول مالحصانة من السما  
وقالها لنا رينا  
مصر في رباط ليوم الدين  
بيقا لازم كلنا ندعي كتير  
ف كل فجر وكل حين  
ونقول آمين  
ونقول آمين  
ونقول آمين

٢٠١٩/٩/٢٤

## عزف الورد

الورد يعزف في الجنائن  
عا لنسيم  
غنوة الحب القديمه  
من سنين  
الزهور ترقص الفالس  
ويا العاشقين  
يا حياتي ونبض قلبي  
ونور حياته  
يا ابتسام ليلى وخياله  
وذكرياته  
تهمس فروعها للفراش  
همسة الشوق والحنين  
تعالى تعالى حب العمر كله  
ندوبه حب الليله دي  
تصرخ الالوان وتضحك

والعبير يحلف مايبعد !  
اللوحة صافيه ربانية  
فقت من حلم في عنيا  
كان حبيبي بين ايديا !!

## حلم الفصول الاربعة

فراشة تحلم بالوردة  
والورده تستنى الندى  
جناين بتحضن الربيع  
حلم الربيع خروج نهائي  
من الخريف  
الشتا سرق الدفا من الصيف  
والصيف بيحرر هدومه  
من الزهق  
ويستنى لحد الليل  
يحن عليه بنساييم هوا  
يبعتها الشتا من بعيد  
والشجر ينده الشقيانين  
يفرش لهم ضله  
ويبص على حلمهم ويتنهد  
الشمس تهرب من ورق الشجر

وتسيح الشوكلاته  
في ايدين العيال  
العيال يجروا على  
اهاليهم يشتكو الشمس  
وقلوبهم خضار الشجر  
يسألوا عن وقت الصيف  
عشان البحر والمايوهات  
يبنوا البيوت على الرملة ..  
ليستخبوا فيها من برد الشتا  
اللي لسه مجاش!

## غيمة

سما نزلت مطر  
بتودع الصيف للسفر  
أفتح فى درفة (ضلفة) الشتا  
وأفتكر  
كان الفتى  
على كتافه الباطو القديم  
ماشي السكك بعيون حنين  
مستني من إيدها الدفا  
ساعة ماتضحك  
يلقى برد التلج  
هربان واختفى  
ياخد فى حضنه نصها  
تعكس المرايات صورتها المهمة  
وتنهيداتها المغرمة

يفتح لها  
الباطن القديم ويضمها  
تشده  
النص اللي باقي منها  
يشتاقي لها  
تسبق نيرانه بردها !

## قلبي متاهه

قلبي متاهه تساعي الدنيا  
مش حتزيدك غير توهان  
مش حتلاقي سكة توصل  
ولا حتلاقي مني حنان  
لف واجري حتلقى سدود  
عينك ترجع تاني اكيد  
ومن الاول تبدأ تاني  
حيرة وغيره وشوق علشاني  
فاكر نفسك اعظم فارس  
تجري بسرعه تعدي حواجز  
طعم السكر لسه بعيد  
اصل متاهتي فى ايدي خيوطها  
مهما تحاول مين يهديك  
بس انا واقفة عليك بتفرج  
بضحك جدا والعب بيك!

## حصالة الفرحة

حصالة الفرحة

اللي بقالها زمان ويايا

بحوش فيها الافراح

وف كل مناسبه

أحط الضحكه ورا الضحكة ومليتها

شموس

انوارها صباح

الحزن كسرهما ودشدشها علشان يرتاح

وزع ضحكاتي على عيلته

حرمان ودموع

وفراق وجراح!

## سألت مرة

سألت مرة حمار عالفرق في الغية

بنت البلد يا حمار ولا الاوربية

معرفش ليه احتار

آل يعني بيضكر

نهق وقال يانهار بنت البلد سكر

البنت دي يا حمار جدعة وتعرفها

يحبها البهوات وكل من شافها

وان حد جه جنبها وقال لها يا جميل

تجرسه بحسها تجري وراه بالحيل

شبشبا ابو وردة ينزل عليه تنسيل

ضحكت ليه يا حمار

مهو انت كنت قتيل !!

## أبويـا الحـاج

الى روح ابي رحمة الله عليه الحج امين منصور الجندي

وأبويـا الحـاج  
اللي ماشفتُه ابدأ مُحتج  
الرضا كان قبلة رُوْحُه  
وله بيحج  
كان يصحى الفجرويتوضى  
بشلال م العشق  
ونايات السّما وياه تكبر  
والروح بتّرج  
عواميد البيت اللي بتشّهق  
عضمها ينشّق  
من طهر دُعاه اللي بيهمس  
انوار بتفج  
وابويـا الحـج اللي ماعمره  
قال كلمة لأ

غير بس لكل شيطان  
حاول يُدخل من شق  
يستغفر وملايكة تحاوطه  
يهدى ويرق  
جلابيته البيضاء بقت ناصعه  
بإيمان القلب  
وبينضح بالورد الطراح  
رياحين المسك  
تترطب في لسانه الآية  
والذكر يفك  
تفاسير الاسئلة وحديها  
تجاوب وتشب  
فايغيب ويسافر ورا روحه  
مجنون بالعشق  
الله الله يارسول غالي  
قرب لي البعد  
مُشتاق للوجه اللي بشوفه في أحلام

الوجد

والصُّبْحُ بِيَجِي عَلَيْهِ دَائِمًا

بِالدَّفَا وَالْوَدِّ

يَتَبَسَّمُ لِلدُّنْيَا بِحَالِهَا

وَيَحْضُنُّنَا بِجَدِّ

نَسْمَعُ أَوْرَادَهُ وَالْحَانَهُ

وَإِغَانِي السَّتِّ

مَنْ عَوْدُهُ الْهَائِمِ وَصَوَابِعُهُ

تَعَزُّفٌ وَتَدْقُ

فِي عَيْنَيْهَا الْهَنَا كَانَتْ أُمِّي

بِتَصْبُ الشَّايِ الَّلِي بِيَغْلِي

عَلَى نَارِ الْحُبِّ

تَضْحَكُ بِرَمُوشِهَا النِّعْسَانَهُ

وَالْفَرْحَةَ فِي صَوْتِهَا خِجْلَانَةَ

مِ الْاَوَّلِ غَنَى وَعَيْدِ تَانِي

إِطْرِينَا يَا حَجَّ !

# شفقة بتنده متولي

باللهجة الصعيدية

حبيبي ياخوي ابن امي وابوى

فى قلبي منك جرح كبير

متكيل كيل

وف عيني منك دمع ثقيل

مايبطل سيل

متباعد ليه عن خيتك

اني لحمي اقدارى

فى عبايتك اني همك

غليان دمك

واليد اللي تشمر كمك عنك

وانت ياخوى الضلة اللي ب تحميني

لما هجير الظلم يجيني

ترمي الدانة ف وش عدويني

وتقوللى

داحنانك من بختي ياختي  
وأه يابعيد زادي وزوادي  
من الفرحة في يدك  
خواتك عايشين في التوهة  
وان غاب الضي كيف راح نلقاه؟  
إسمعني ياخوي مقدرشي  
اتلولو واخبي عليك  
النخل جريده اتحنى ضهره  
مايل على جنبه من قهره  
والارض شراقي والندی باكي  
الارض بتزقق من نار الحرت  
عما تتقلب بشبابها  
ورمانهم فرط  
بس انت خابرنی  
الريح العاتية متقدرش تاخذني  
كمني راسية ومتبته جدر  
والخلق بيعرفوا اسمي

وخابرني شبر بشبر  
ويضوت الحول ووراه كام حول  
يتقدموا يخطبوا ودي  
ولا حد ان كان  
ولا انس وجان  
بيجي يقرب مني  
إسمعني ياخوي  
اخواتي جاروا عليهم  
زرع شيطاني  
وسقوهم من حنضل براني  
خلعوهم من كل ديارهم  
والارض شراقي وحرزنها باقي  
والخوف غليان  
بالمنجلة طايح  
وعليهم فرض  
صدقني ياخوي  
خزيانة اتحدث واقولك

مهناشي قلوب شده رباطها  
ولا نخوة تحاجي  
على عيالنا ف باطها  
واتفرق شمل الاحباب  
ارجع لي ياخوى  
محتاجة حمايتك  
كفايانا عذاب  
كفاينا عذاب!

۲۰۱۹

## فرسة ومتلجمة

مبتصدقش

ولا مرة فهم قلبك

غرامي ليك

واخلاصي اللي دوبته

في بحر عينيك

وروحى دى اللي

عاشت بيك

ولا بترحمش

وشكك نار محصراني

تحاورني كل الاسئلة

وكل لفتة من عيوني مشكلة

لو حد اى حد بص لي

وهمك يصورلك

ما بيني وبينه شئ قديم

واني طبعا مذنبه

ومبتسمعش  
آهة عيوني في البكا  
وبراءتي تترجاك  
وتحلف ميت يمين  
اني بهواك متعذبة  
ولاشايفه غيرك في الوجود  
رغم اني بيك متأنبة  
والصح ايه ..الصح اكون مغمضة  
تسحبني فرسة ملجمة  
مسجونة جوه جنون هواك  
تعصر الدمعة ان بكيت  
بتصدق الهوس اللي فيك  
وتعد انفاسي اللي بيك  
متألمة  
موت قلبي اللي اتحرق  
على نار رضاك  
موت شوقي اللي غرق

فى بحور ندم  
عشقت هواك  
إبعد هواك إرحل هناك  
ياريتنى اقدر  
انسى ذكرى مؤلمة  
واتمنى فرحة  
من السنين متقسمة  
بينى وبين الحب  
أبدأ من جديد  
والاقى قلب يحبنى  
واكون بحبه مؤمنة !

## رحاية الاتويس

شقيت طريقي في الزحام  
وقع ايشاربي شعري بان  
بلوزتي اكرمشت جداً  
وجسمي هان على ناس تزق  
معندهاش حبة أدب  
ومين بيسمع د العتب  
زرار الجيبه فجأة نط  
صرخت صرخة واتلفت  
سندتها وعليها مُت  
يا عيون جبانه متخشيش  
اتعودت تبص من ورا أي شيش  
فردة شرابي كشكشت  
والتانية منخل نسّلت  
مهو كلوزق  
ولا حد حتى لحالي رّق

حسيت ودانى  
ملقيتش غير فردة حلق  
راحت كمان السلسلة  
وايدى كان فيها  
غويشة واحدة مسحلله  
تحويشة العمر اللى غرقان  
فى الشقا  
شوفو بقى  
سرقوا شقايه وشنطتي  
كل اللي فيها اتسرق  
من قهرتي  
صرخت قلت يادهوتي  
ياخلق هوووو  
اللي سرقني ياناس هاتوه  
المطوة غزت جنبي  
م الناحية اليمين

وقبل ما قولوا أنت مين  
لقيت عينيه مّقربين ومّبرأين  
رعشت شفایفي ضحكت له  
وقلت له  
متشكرين متشكرين!

## جريمتك

جريمتك واضحة زي الشمس  
قتلت الخوف فى عين الشمس  
زعقت الآه فى ليل الهمس  
وعشقتك سبق اصرارك  
فتحت عليك حيطان دارك  
وقلبك من حطب نارك  
بيصرخ عالي ما بيحس  
جريمتك للنهار بتميل  
نهار واضح  
ومش محتاج لاي دليل  
طعنت الكذب سبته عليل  
فضحت ضمير ديدانه تسيل  
بياكل لقمة المهازيل  
بسن رصاص  
تنشن عالوجع فى الراس

نبشت في جثة الحراس  
وقطعت الكفن في النور  
ياقاتل للشهادة الزور  
حكما عليك حيي الدور  
نغمي عينيك  
في ساقية تدور  
ويندم صوتك المحظور

## رباعيات الثورة

٢٥ يناير وشبابنا اتفقهوا  
على صحوة مكبوتة من بعد ماتخنقوا  
من شرقهم للغرب فيس بوك جمعهم  
قالوا مسيرة حق لو حتى يتشنقوا

من ظلمهم قاموا لنظام مضيعهم  
دس العسل في السم ولامتى يخدعهم  
طلعوا بزهوة روح لمظاهرة محسوبة  
صرخ العذاب بال أه من فقر شعبهم

ندهوا ياظلمة اسمعوا لما اتنبح صوتهم  
والرد ينداسوا ويموتوا صوتهم  
غرقوا مع الاحلام عالنت بيغازلوا  
جيبهم ابيض وليل سهران بيوعدهم

اترصوا في قهاوي وجديدة لغوتهم  
بيألفوا في حروف ارقام تعلمهم  
والشيشة سهاية دائرة بتقتلهم  
خطف الغراب مصرهم والبومة حرمتهم

بيقلدوا الموضة ويغفوا مكى وراب  
وكل واحد دراعه على وسط واحده هباب  
ماشيين على الكورنيش بيضيعوا الاوقات  
حتى القليل مي جيش والصبر ريقه عذاب

يتباهوا بس بأيه يتباهوا بشهادة  
عالحيطه متعلقه دابت كما العادة  
وما فيش طريق مرسوم غير بس حنك السبع  
خاليه الوظائف ليه وبطاله في زيادة

شوف كام سنة والحلم مكسور ومتألم  
اصل الوظيفة امل نصبر ونتعلم  
وادي طابور العمل مستنظرين الدور  
الباشا خدها وطار لابنه اللي ما اتعلم

الغريه ضمتنا وانتي اللي من لحمنا  
نغسل كوام اطباق لما انحنى ضرنا  
لا بقيتي طايقانا ولا عايضة شي مننا  
وشايفه أشواقنا بتهد من عمرنا

رمىنا نفسينا على هجرة في الميه  
قالوا اسبحوا يا شباب قوتكوا دي عفية  
صلى علينا الموج واتوضى بدمانا  
ورجعنا لك يا مصر في نعوش معيبة

فينا اللي أكله الحوت يا حيتان ومتخصصة  
من حوت بلدنا نفوت وعضامنا متمصصة  
واللي سلم م الموت بسرعه يترحل  
ولا حد خد تارنا جثث ومترصصة

لا فينا واحد طال غير حلم مع مزته  
محفورة في صباعه كام سنه من كزته  
م خطفها المليونير بفلوس محبته  
ودموعنا نزلت سيل من قهر سطوته!!

والشعب لازم يكون في خدمة الشرطة  
مونا على بعضنا في البوكس كام قرطه  
عاطل على باطل يزوروا في الحق  
والحق كان حظهم موقسّموا التورتة

فجأة لقينا جابرة طالعين على التحرير  
وعضهم طقطق بيطالبوا بالتغيير  
يضموا على بعضهم مسيحي مع مسلم  
ايدهم ف ايد الجيش وعندهم تبرير

آدي اللي صار يا جمال للمظلمة ثورة  
يا عظيم يا بوخالد يا قائد الثورة  
فينك تعالى وشوف بعدك بيحصل ايه  
وحياة عهدك يا نيل راح ترجع الثروة!

## سيادة المشير

جنا بك فخامتك سيادة المشير  
يامصري يا شايلى فى همى الكبير  
يا قوة ونخوه يافاهم كثير  
تعالى وغيتنا وارسم طريقنا  
وكمل جميلك تشاور نجيلك  
وتوفى وعودك عزيزة جنودك

يا فارس وحارس حدودنا ودمانا  
يا صابرو قادر توحّد خطانا  
يا هازم مكاييد يا كاييد عدانا  
سواعد جنودنا بتوصل سمانا  
وتقضى عالي يخرّب ف بيتنا  
تدك حصونهم وترفع رايتنا

وتهددي ورودك لأم الشهد  
تداوي تططبب يلين الحديد  
تنادي بصوتك نقولك نعم  
ننفض اومرك نظير بالعلم  
وبكره ياسيسي حتبقى رئيسي  
ومصريوم فرحها تقول داعريسي  
ومصريوم فرحها تقول دا عريسي!!

## شاعر درویش

يامسکين..

فايت كل بنات الدنيا

وعايش وحدك

ويا بنات أفكارك

حبه بتضحك

حبه تميل على حزن حنانهم

تحكي معاهم قصص الحب التايهه

في حزن الأساطير

تزرع لك جناحين وتطير

عالم سابق أي حدود

بيشوفها الطير

قالو عليك شاعر مجنون

بحر غريق أمواجه فنون

آهة قلبك ساكنه الرمش الفارش

حزنك

قالو عليك عفريت الجن بيلبس إسمك

جوه عيونو كلامك شوقك ..

تكتب ..تكتب

من رعشة سيلوفان

طياره مالكة الخيط

طفل صّغير

واخذ حزن عروسة حلمه

طاوي عليها حروف البيت

واما بتعلا شمعة قلمك ..

تنزل ضحكه في دمعة حزنك

بوح الآه من حب عنيد

آه يا خساره

ليه مبقتش أبو عين عسليه

ولا بتغازل كل صبيه عينيها عليك

ولا بتشوف الخوخ الطارح جوه خدودها

نور ضحكتها يشاورليك

ليه يارهيف

طالع كده من قلب غمامه

عالأسفلت بتمشي خفيف

رقصك يبهج حزن الريش  
قالو عليك مجذوب درويش  
ولا عرفينك فين بتروح  
ولا فهمين إيه حب الروح  
روحك هايمه في نص الروح  
حاضر عنها تنادي عليها  
وراها تغوص  
ورا فستانها الطائر الاخضر  
على عطر حنانها المسفوح  
تشهق للنور وتغيب  
تايه مخطوف وبعيد  
والشوق بيقيد جمرك ويفيض  
على كل بنات أفكارك  
وبنات الدنيا  
بنات الدنيا  
عليك بتغيب!!

## أنا وأم جورج

جارتى القريبة ام جورج

وام مريم الحبيبة

كل يوم

تحذف لي وردة من الجنينة وتناديلي

صباح الخير يا ست فاطمة

ابتسم ليها بشوق

صباح النور يا جارة ذوق

تعالى نشرب القهوة سوا

ناخد وندي في الكلام

اصل الكلام منك دوا

بحكيلها دايمًا ماجرى

واعيد معاها الذكريات

من حنانها واللطافة

تجري وياها الساعات

كل عام

بتهنى كل المسلمين من الجيران

وتشتري فانوس كبير

هدية للشارع كمان

وابو جورج ييجى يعلقه

وينوره ويا الشباب

وعيالنا يجروا يهللوا

ويكبروا من كل باب

له يوم بيضطر عندنا

ويا ام جورج والعيال

يغنوا وحوي ويلعبوا

بفانوس ولادنا بكل ود ماهم صحاب

واما يجيى العيد يقرب

بتساعدنى فى العمائل

تضرم معايا البسكويت

وتنقش الكحك بهلايل

وتعدل الصاج اللي مايل

مرة جورج اتسرق منها وتاه  
كات بتجري ف الشوارع  
الحقوا ابني اللي ضايع  
رجعيه لحضن امه يابتول  
انتي اول وانتي آخر الحلول  
كل بيت كان فيه صغير  
ولا كان راجل كبير  
طلعوا يجروا في الحواري  
والعيال عصافير تطير  
اللي يدعي يقول يارب  
ياللي مالك يامنجي من المهالك  
واللي قال اسم الصليب عليك يا جورج  
واللي راح القسم اوصافه يصور  
واللي جاب عربيته بيها عليه يدور  
اما انا قلبي لغيابه انفطر  
ولقتني بصرخ يام هاشم  
نجي جورج من الخطر

ندرعلي الندر يوفي مش كلام

لقيد له مني شمعتين

وركعتين جوة المأم

القلوب كلها كات قايدة نار

لحد ماطلع النهار

فجأه بصينا لقينا جورج جي بييتسم

كات فرحته على لهفة امه

وصبر ابوه بتتقسم

ايدو في ايد شيخ المشايخ

عم عبد الواحد

جريوا عليه وفي نفس واحد

لقيته فين

قول يا شيخنا لقيته فين

ردقال من هنا بمحطتين

بعد ماصليت وراجع

التقيته كان بيلعب جنب جامع

الله محبة تضمننا

في الشدايد يد واحده كلنا

## نجمۃ داوود

كل الشوارع

أرضها تنزف حريق

الدمع دم يحري عالطريق

وكام شهيد فين الصديق

فين اللي مسكين الميزان

الظلم واقف ديدبان

بيمرغ العدل ف ترابه

والعدل من قهره وعذابه

يصرخ على طهر الكنايس

والمساجد ف الآدان

آه ياكلام اصبح صراخ

الحق داخ

مابين مؤيد او معارض

والفخاخ منصوبة

طلقات في الدماغ

الحية لسه بتنتقم  
وتوجه السم الزعاف..  
الحية لفت ديلها  
علي كل الحواف  
نجمة داوود شبعث دفا  
من مين تخاف  
مسنودة ورا ضر اللى شاف  
اللى قايدة للحرية شعله..  
ترهب اللى شاف  
الاتحاد والقوه فيها من زمان  
فين العزيمة والمقاومة  
دوسوا شياطين المساومة  
وازرعوا مليون صلاح  
أزرعوا مليون صلاح!

## جریمتک

جریمتک واضحه زي الشمس  
قتلت الخوف  
فی عين الشمس  
زعقت الآه في ليل الهمس  
وعشقتك سبق اصرارك  
فتحت عليك حيطان دارك  
وقلبك من حطب نارك  
بيصرخ عالي ما بيحس جریمتک  
للنهار بتميل  
نهار واضح  
ومش محتاج لاي دليل  
طعنت الكذب سبته عليل  
فضحت ضمير ديدانه تسيل  
بياكل لقمة المهازيل  
بسن رصاص

تنشن عالوجع في الراس  
نبشت في جثة الحراس  
وقطعت الكفن في النور  
ياقاتل للشهادة الزور  
حكمننا عليك حيحي الدور  
نغمي عينيك  
في ساقية تدور  
ويندم صوتك المحظور

## استنيتيه

استنيتيه بفرحة قلبي  
وقلت ياعيني خلاص اهو جاي  
استنيت زوقت البيت  
وعملت الكحك معاه الشاي  
ونسيت انه في يوم زعلني  
وخالص مش حزعل وايه يعني  
مهو لما زمان كان يواعدني  
بيجيني ويفضل ويبي  
أتأخر ليه راح فين ولأيه  
وازاي كده يعني يسيبني ازاي !  
دورت عليه ونا مشتاقه  
وسألت الناس  
ابو ضحكة وفرحة وأغني  
وقمري الوناس  
فالقيت الدمعه المنسية بتقولي خلاص

مش راجع ليكي بهدية  
ولا جايبُ حب ولا عيدية  
على ايده دم الاطفال  
راح غزة يفرح في عيالها  
فلقاهم شهداوابطال  
والبسمه الحلوة في جنازة  
عالشاشة بتعلن اخبار  
بوداني صراخ والظلم رياح  
في ديار أطلال  
والظالم مجرم مش حاسس  
وبيرمي النار  
ولا فارقه معاه رمضان أوعيد  
عمال بيزيد  
وبقلبه الميت صرخ العيد  
واهو مات العيد  
اهو مات العيد!

# نور رباني

صاحبى المبصر

كان بيحاول دايمًا يبهر

كل اصحابى وكل جيرانى

والبنت بتاعتى

اللى بحسها حُبها ربانى

كانت تسهر طول الليل

تحكى معايا على التليفون

وبنتبادل شوق مجنون

صوتها الحلو شبكنى اكمناه

حسه قطيفة صايف حنون

كنت احب اتخيل لونها

شكل ايديها عينيها طولها

اول مرة اتمنى عيوني

دقيقة تفتح

لجل اشوفها

واسأل صاحبي المبصر عنها  
أوصفها لي حلوة صحيح  
كان يحسدني عليها يقول لي  
ايوة يا عم  
اجمل واحدة  
تحبك انت وبيك تهتم  
وانا من خيبيتي  
كُنت بشكرٍ فيه لحبيبيتي  
كنت احكيها عن حركاته  
عن خفة دمه وقضياته  
لما يفرقع فجأه صاروخ  
ويخليني انط وادوخ  
نفضل نضحك لما نحس  
بأن السلك معانا يكركر يضحك  
فاتوا يومين وتلاته وعشره  
غابت عني  
ولابترد على التليفون

صاحبي كمان اختفى وهجرني  
كُنتُ بحس النفس الدايف  
قرب مني عليا من امي  
قبل ماتنده وتطبطني  
مالك يابني مالك يابني  
بقيت كده عصبي  
كل شوية توقع حاجه وبتخبط جوة

### البيت

دانا منقلتش خالص حاجه  
ومغيرتش عفش البيت  
ليه بتسيب  
الاكل فى طبقك  
أيه يا حبيبي سادد نفسك  
متخبيش زعلك  
دانا أمك  
آخذ ايديها ابوسها  
صحبي المبصر

غايب عني  
ادعي له يا أمي  
روحي تكمل غصبِ عني  
حاسس انه خطفها ياامي  
كنت اتخيل نفسي معاها  
جوه خميلة  
واماً اسمعها  
اشوفها جميلة  
صوتها واخذني  
لشوق مسحور  
ايدي تمر برعشة نُور  
على شفايفها  
ايوة شايضا  
قلبي يقوللي ايوة عايزها  
فجأة تبوس شفايفها ايدياً  
أغرق كده في بحور حنية  
دق الباب صحاني مني

صاحبى المُبصر قدام منى قاللى أَعذرني

نور ربانى منك جالى

هدانى فى سيري

شفت حبيبتك تعشق غيري

قالت هو حبيبي وطيري

قالت اسمك قدام عيني

انا من يومها حلفت يا صاحبى

عمري محاخذ

حاجة غيري

عمري ما حاخذ

حاجة غيري

## وقالوا جاي

تلت دقايق في حب عبد الناصر

حيفوت هنا من عندكم

ضروري جاي

الفرحة طرحت عالوشوش

والناس بتتسابق جيوش

زغاريد بنات وامهات

مترصصين في البلكونات

معلقين صورته الجميلة والرايات

ومزوقين كل الشوارع

بالزيينات

وبيهتفوا بالحب فيه

علشان يفوت تفرح عينيه

وانا كنت تلميذة بخيال

وبسأل الحلم بسؤال

ياهلترى

لو شافني راح يقولني  
ايه يامر ايتي قولني  
البس له ايه  
فستاني ده وضايري دي  
تفتكري هو يحب ايه  
ولقتني طالعه عالكتاف  
ودموعى نزلت م الهتاف  
القطر صوته من بعيد  
في وداني ناااي  
هلت بشاير طلته  
وقمرنا نازل م السما  
قرب وجاي  
ضحكت عيونو المؤمنة  
شاور بايده المخلصة  
الله اكبر  
انطلق دمع السكات  
الله اكبر يا ابو خالد يا جمال

ياللي حققت الآمال  
كانت دقيقة بعدها  
عدى وفات  
كل البلد جريت وراه  
كان حلمها تسافر معاه  
مال الشجر على بعضه  
يحضن خضرته  
وقلبي طار من فرحته  
عدت سنين  
وانا لسه واقفة بفتكر  
قلبي اللي حبه  
ومن غيابه إنفطر  
دا اللي ناصر بالكرامة  
وثورته الخضرا علامه  
واللي حقق المحال  
صعب انسى دا الجمال  
صعب انسى دا الجمال !

## وشوش صفرا ايدين بسكوتة

وشوش صفرا وشداني  
على دوامة وخداني  
بتبهر عقلي وتفاخر  
عيوني الواسعه مفتوحه على الآخر  
وطول الوقت بسأل روعي  
ياروعي قوليلي انا فين  
سمعت الفجر بيأدن  
وشفت الكعبه جوه فانوس  
غناوي وحوي يا حوي  
تلف بنورها يا جماعه انا مهووس !  
ابص شمالي ويميني  
وشوش صفرا ..  
وشوش صفرا وكف ايديها بسكوتة  
تبيع لي وهيا مبسوطه  
وكان قلبي يدق بلهفة عا المصروف

ترجع لي كثير باقي يطير الخوف

وتسألني..

جوبني بسرعه ناقصك ايه

بأرخص سعر اصدرك

وامتى وفين

يانايم لسه على حالك

يانور العين ..

وشوش صفرا

عنيها من وتر مشدود

تشد الحيل مكن وخيوط

عمل وكفاح امل بركان بألف جناح

وبتصدر شعاع لصباح

وتتصدر على العالم خطوط انتاج

تغرقنا في بحر الجات

وتضحك منا تدينا طبل وصاجات

ايدين بسكوتة

بتطير رقابي الفقر

وتعلا فوق تبص لنا بنظرة صقر  
فأرجع افكر تاني  
واسأل روعي ياروعي  
قوليلي انا فين  
يرد النخل من بلدي  
ياحبة عيني ياولدي  
يامروي من حلاوة النيل  
نسييتني خلاص !  
ارد واقول  
ماانتي كمان نسييتيني  
وصدرتيني للصيني  
وبا حلفلك ياهبة النيل  
حييجي الدور عليك يميل  
تلاقي النيل هجر طميك  
بقا مراية وشوش صفرا  
بيتنفس هوا صيني !!

## وسايح من بلاد الثلج

يحب الشمس هجر البرد  
على سطور التاريخ ماشي  
وفي عيونو الفرح كاسي  
معاه عدسات

تصوّر له في معجزات.  
ويّتسمر قصاد سّمر  
خدودها قايدة من جّمرة  
محرار اللولي ضحكها  
بتتعاجب في مّشيتها  
وعودها لفّ ملايتها  
تغير منها مرايتها  
عينيها نجمتين تهرب  
ميقدرش القمر.. يتّعب  
ومنديلها ابو أويّه  
على القورة اللي بنّورة

ح ياكل منها ١٠٠ حته  
كعاب رجليها غزلاني  
ومتحنية ريانى  
عيونوبىها مبهورة  
يقرب ..  
يلقط الصورة !

## شباك وطن

شباك بيزعق عالخلا  
محبوس وراه قلبي الضعيف  
شباك بيصرخ في الهوان  
كسر البُعاد شوقه الرهيف  
والريح غرامك ياوطن  
الضي غاب أخذ التمن  
كل الدروب بقى شكلها  
إسود مُخيف  
شَهقت جنائن زرعيتك  
على وردتك حُرَيْتِك  
خاف الحمام من طلَّتِك  
فارقك على دمعة وليف  
ناح الغنا صوته مرار  
والبوم نهش كبد النهار  
زعق الصدى يبني العِشش

يَبِّعْتُ عَسَسَ وَسَطَ الْغُبَارِ  
نَزَلَ الْمَطْرَدَمَّ وَسَلَّاحَ  
حَبْلِ الْهِنْدِيِّ شَهْدَا بَجْنَاهِ  
مَنْ بَيْنَ سَحَابِكَ يَا وَطَنُ  
قَلْبِي اتَّعَجَنُ  
وَأَنْتَ الْمَبَاحُ !

# محامي شباب

سيادة القاضي

أنا عنهم شباب اليوم

شباب فاضي

بيتسابق في بحر النوم

شهادة حق بحلف لك

شباب مظلوم

باعولوا الوهم في شهاده

وعاش مصدوم

وصوته ضااااااااع

رماه اليأس ع الإدمان

بيدمن شيشه أو سيما

ويدمن نت

نهاره وليله ويا الشات

يغازل بنت

على القهوه على الناصيه

على الرصفان  
ونار في جسمهم قايدة  
وجوع حرمان  
ومزيكا على عينك  
بترقص كلها القنوات  
عرايا ولحمهم فاضح  
دا غير الغمز والإيحاءات  
سيادة القاضي إسمعني  
أنا صابر  
لكن غيري ماهوش قادر  
إيديهم فاضيه ع الآخر  
وأى جوازه بتعجز  
يطالبوا الشاب لو جهز  
يشوف شقه وعضش جديد  
عشان خاطر أبوها الوحش  
يبقى سعيد  
ولا يهموش ولو تكبر مآسينا

على أكتاف على أنفاس أهالينا

ومجبورين

يشيلوا عنا بلاوينا

قتلنا الحزن في منامنا

هروبنا إزاي يداوينا

سيادة القاضي لوراضي

نهاجر كلنا لبلاد

يجيبوا عالينا واطينا

ويرمونا بتلفيات

مافيش ولا ظهر يحمينا

وكله يخاف ويتفرج

مافيش واحد هنا فينا

بيتحامى في بطن أبوه

ولو له ظهر يتحامى

حا يتحامى في حصانة ابوه!!!!

٢٧ أغسطس، ٢٠١٠

## استغماية الحق

من واحنا كنا صغيرين  
الحق كان صاحب لنا  
تنده عليه يرجع لنا  
ويجيب لنا من اي ظالم حقنا  
الحق كان بيحبنا  
واحنا كمان حبينا  
لعبنا معاه وغمينا  
من يومها واحنا بننده  
إرجع يا حق ارجع لنا  
خلاص يا حق؟  
يقول لنا لسه  
خلاويص يا حق؟  
يقو لنا لسه  
لسه ولسه لما غاااب  
أوي عننا

الحق سَابِنَا لظلمِنَا  
نظلم وننتهم بعضِنَا  
ونستخبى في جلدِنَا  
لكنه لسه في قلبِنَا  
عَيش معَانَا كلِنَا  
مَلامحهُ سَاكنه في وشنَا  
بننده عليه  
إرجع يَا حق اطلع لِنَا  
الحق لَا مَاهوش عَلَيْكَ  
حَقَّ عَلَيْنَا كلِنَا  
صَدَقْنَا خَوْفْنَا ودمعِنَا  
وَكَدَبْنَا لِيه عَلَى نَفْسِنَا  
ونسينَا أَنكَ حَلَمْنَا  
إرجع يَا حق كِفَاك بَقِي  
وَاروِينَا مِنْ حُضْنِكَ لُقَا  
جَنَحَاتِنَا غَاوِيه زَقْرَقَه  
وَسَلَامِنَا فَجْر الشَّقْشَقَه

الحق جاى مع الربيع  
الحق نسمه للجميع  
بستان فرح للمظلومين  
التعبانين المقهورين  
أرجع يا حق كفاك بقى  
مستنين ترجع سنين  
ارجع بقى ارجع بقى

## السيرة الذاتية للشاعرة

مواليد محافظة الشرقية  
حاصلة على ليسانس آداب وتربية (جامعة الزقازيق )

### الاصدارات

- ١- ديوان بالعامية المصرية عصفور الحرية ٢٠٠١
- ٢- ديوان التوب الضيق ٢٠٠٥ بالعامية المصرية
- ٣- ديوان ارتعاشة قدسية (نثر فصيح) ٢٠١٦
- 4-مسرحية بعنوان (عروسة قماش)لמناهضة الختان

### المؤلفات

- ١- اوبريت اشعار هلال رمضان
- ٢- قصص قصيرة بعنوان خيانة زوجية
- ٣- فيلم قصير بعنوان ( سهرية ملموم وحكاية)

### المشاركات

- مؤتمر شبين القناطر ٢٠١٠
- مؤتمر ادباء مصر (اسوان) ٢٠١٦
- مهرجان شعر العامية ثلاث سنوات على التوالي بأتيليه القاهرة
- برنامج انتي الاولى القناة الاولى الفضائية
- برنامج حكايتي مع المكان القناة الاولى الفضائية
- برنامج طعم البيوت لقاء في القناة الثقافية
- اوبريت اكتوبر ٢٥ يناير على مسرح البالون

مشاركة بندوة عن شهادتي الشعرية باتحاد كتاب مصر  
مناقشة ديواني ارتعاشة قدسية باتحاد كتاب مصر

## العضويات

عضو اتحاد كتاب مصر  
عضو اتيلية القاهرة  
محاضر مركزي بالثقافة العامة  
عضو جمعية سيد درويش للتراث والموسيقى  
عضو جمعية الكاتبات المصريات  
عضو جمعية الجيل الجديد نقابة الصحفيين  
عضو جمعية دار الادباء  
عضو جمعية الزجالين وكتاب الاغاني

## الجوائز

جائزة احسن ديوان عامية (التوب الضيق) على مستوى  
جمهورية مصر العربية المركز الاول من جريدة الجمهورية  
٢٠٠٩  
جائزة احسن قصيدة من مسابقة جمعية الكاتبات  
المصريات

## الدروع

درع هيئة قصور الثقافة  
درع جريدة البوابة نيوز  
درع كلية التربية والاداب  
درع الجامعة العربية من الكلية البحرية  
درع احسن شاعرة مصرية منتدى نغم لسنتين على التوالي

كأس التفوق الشعري من نادي الشمس  
عدة ميداليات من نادي هوليوبلس  
نادي الشمس .نادي ادب الزيتون

### اللقاءات الصحفية

مقالة عن ديوان عصفور الحرية جريدة القاهرة  
لقاء صحفي في جريدة البوابة نيوز  
مقالة عن ديوان ارتعاشة قدسية الاهرام المسائي  
المؤلف المسرحي بهيج اسماعيل  
نشرت معظم القصائد بجريدة المساء والعمال والجمهوري  
والكثير من الجرائد والمجلات الاليكترونية

## الفهرست

٣	الإهداء
٤	إلا النبي
٦	ياست الكل
٨	العيش البايث
١٠	بيتنا القديم
١٢	كانت أيام
١٦	أول كلامنا
١٨	الأرض
١٩	جلب الحبيب
٢١	حلاوة روح
٢٣	انا وانت
٢٤	يا شباب بلدنا
٢٩	عزف الورد
٣١	حلم الفصول الاربعة
٣٣	غيمة
٣٥	قلبي متاهه
٣٦	حصالة الفرحة
٣٧	سألت مرة
٣٨	أبويا الحاج
٤١	شفيقة بتنده متولي
٤٥	فرسة وملتجمة

٤٨	رحاية الاتوبيس
٥١	جريمتك
٥٣	رباعيات الثورة
٥٧	سيادة المشير
٥٩	شاعر درويش
٦٢	أنا وأم جورج
٦٦	نجمة داوود
٦٨	جريمتك
٧٠	استنيته
٧٢	نور رباني
٧٧	وقالوا جاي
٨٠	وشوش صفرا ايدين بسكوتة
٨٣	وسايح من بلاد التلج
٨٥	شباك وطن
٨٧	محامي شباب
٩٠	استغماية الحق
٩٣	السيرة الذاتية للشاعرة